

IN MEMORIAM

BOBAR NEMANJA, GEODETA U PENZIJI



12. juna 1980. godine, u 68-oj godini života, umro je naš kolega Bobar Nemanja.

Pripadao je istaknutoj generaciji geometara, koja je dala veliki doprinos u obnovi i izgradnji naše zemlje i razvoju geodetske struke kod nas.

Osnovno obrazovanje stekao je u rodnoj Vlasenici, a srednju školu pohađao je u Sarajevu i Beogradu, gdje je i maturirao na Geodetskoj tehničkoj školi 1931. godine. Prije rata radio je kao geometar na novom premjeru u raznim mjestima u Srbiji, a zatim u katastarskom uredu u Vlasenici. Poslije oslobodjenja naše zemlje, istakao se kao radnik i rukovodilac na radovima novog premjera u Bosni i Hercegovini.

Kao iskusan stručnjak, obogaćen praksom i stručnim znanjem, radio je jedno vrijeme kao nastavnik na Geodetskoj školi u Sarajevu, a zatim u Republičkoj geodetskoj upravi na dužnosti inspektora za katastar, sa kog položaja je i otišao u penziju.

Bobar Nemanja dao je veliki doprinos geodetskoj struci i službi, kao radnik i kao vaspitač. Bio je divan drug i prijatelj. U kontaktu sa ljudima uvijek je polazio od povjerenja, pa i onda kada je kao rukovodilac i vaspitač bio u prilici da odlučuje o sudbini čovjeka.

Uvijek je bio takav, do kraja iskren i odan drugu i čovjeku. Njegov vedri i plemeniti lik ostat će nam u trajnom sjećanju.

Neka mu je vječna slava i hvala!